



Cuira, ils 5 da fanadur 2022

Communicaziun a las medias

## La Lia Rumantscha visita 40 scolinas

**Las promoturas regiunalas ed ils promoturs regiunals da la Lia Rumantscha han visità ils ultims quatter mais bel e bain 40 scolinas rumantschas e bilinguas en il chantun Grischun. A moda ludica èn ils stgars 600 uffants s'occupads durant ina lecziun cun ils avantatgs dal rumantsch e da la bilinguitad.**

Contacts persunals èn indispensabels per animar e sensibilisar ils uffants per il diever dal rumantsch. Pia han las promoturas regiunalas ed ils promoturs regiunals da la Lia Rumantscha visità tranter il mars ed il zercladur da quest onn bel e bain 40 scolinas rumantschas e bilinguas en il Grischun. Las ultimas pèr scolinas visita la Lia Rumantscha suenter las vacanzas da stad. L'intent da las visitas è d'intgantar ils pitschens gia en scolina per la lingua rumantscha e da render attent las mussadras ed ils mussaders a material didactic che stat a disposiziun per rumantsch.

Nic e Luisa, ils uffants da la famiglia Babulin, han accumpagnà las scolarettas ed ils scolarets tras la lecziun. Tschertgar ils sbagls en in maletg, giugar memori, dar en color sets da maisa ed explorar l'app dals Babulins – durant ina lecziun han stgars 600 scolarettas e scolarets pudì scuvrir divers posts. Per finir han ils uffants pudì interpretar sezs las figuras da la famiglia Babulin. A chaschun da la visita ha la squadra da promoziun pudì sa barattar cun las mussadras ed ils mussaders ed ha era pudì prender encunter giavischs. Plinavant han las promoturas regiunalas ed ils promoturs regiunals preschentà il material didactic dal program da famiglia kidsfits ch'ins po telechargiar gratuitamain da la pagina-web da la Lia Rumantscha.